

Här Fernand Etgen  
President vun der  
Deputéiertechamber  
19, um Krautmaart  
L-1728 Lëtzebuerg

Lëtzebuerg, den 11. Mee 2021

Här President,

Sou wéi d'Chambersreglement et virgesäit, bieden ech Iech, dës parlamentaresch Fro un den Här Minister fir Ekonomie, d'Madamm Ëmweltminister, den Här Energieminister an den Här Mëttelstandsminister weiderzeleeden.

An engem Artikel iwwer d'Journée de l'Économie "Die Wirtschaft umgestalten", deen den 30. Abrëll am Lëtzebuerger Wort publizéiert gouf, gëtt op d'Problematik higewisen, datt och déi sougenannt "gréng", also Energietechnologien, déi am Gebrauch wann och net bei der Produktioun, wéineg oder keng Zäregase fräisetzen, vu bestëmmte Matières premières, notamment raren Äerden ofhängeg sinn. Déi aktuell bekannt Virkomme vu raren Äerde leien ausserdeem a wéineg demokratesche Staate wéi China an dem Kongo. An enger fräier Ekonomie steet de Mënschen duerch d'Zesummespill vun der Offer an der Demande iwwer de Präis e wonnerbare Fréiwarnsystem zur Verfügung, fir op déi zukünfteg Raritéit vun enger Ressource ze reagéieren. Wann eng Ressource ufänkt knapp ze ginn an/oder sech nëmmen nach duerch zousätzlechen technologeschen Opwand férdere léisst, klëmmt de Präis an d'Entreprise wëssen, datt si mussen ufänken an d'Recherche no engem Substitut an/oder alternativen Technologien ze investéieren. Duerch Interventiounen vum Staat, notamment Subside fir rar Ressourcen a falsch Regulatiounen, kann dës Fréiwarnsystem vum Präismechanismus awer duerchernee bruecht ginn an déi néideg Upassungsprozesser gi fir d'éischt verzögert, fir duerno em sou méi schmäärzvoll anzetrieden.

Duerfir géif ech der Regierung gär des Froe stellen:

- 1) Kéint d'Regierung sech virstellen, fir am Sënn vun der Nohaltegkeet op nationalem Plang zukünfteg op sämtlech ekonomesch Subventiounen ze verzichten fir e méiglechst effikassen, maartwirtschaftleche Informatiounssystem zu de rare Ressourcen ze garantéieren? Kéint d'Regierung sech virstellen, sech um Niveau vun der EU fir eng Reduzéierung an idealerweis eng komplett Ofschaffung vun deenen diverse vun der EU-Kommissioun bezuelte Subsidien anzesetzen?
- 2) Aus der Äntwert op meng parlamentaresch Fro Nummer 3834 geet ervir, datt sech de Präis fir Brennstoffer vu private Gefierer aktuell zu iwwer 50 Prozent aus Steieren an Accisen zesummesetzt. Hei gëtt dem privaten Autoschauffer iwwer de Präis also eng kënschtlech Raritéit signaliséiert, déi sou net existéiert. Kéint d'Regierung sech virstellen, de steierleche Kader fir déi verschidden Energien am Beräich vun der Mobilitéit (Bensinn, Waasserstoff,

Stroum...) ze standardiséieren, fir dem Bierger e méiglechst objektiv Bild iwwer den natierleche Präis an domat den Undeel vu rare Ressourcen um jeweilege Produit ze garantéieren an des Initiativ idealerweis op de komplette lëtzebuergeschen Energiemarché ze erweideren?

- 3) Aktuell gött souwuel an der nationaler, wéi an der europäescher Politik vill iwwer den Asaz vun der Nuklearenergie diskutéiert, déi bei der Stroumerzeegung bal keng Zäregase fräisetzt. Lëtzebuerg ass wéi sämtlech Länner vun der europäescher Unioun, um internationale Forschungsprojet zu der Kärfusioun "Réacteur thermonucléaire expérimental international" bedeelegt. Wéi beurteilt d'Regierung en vue vun enger sougenannter "klimafrëndlecher" Politik den Asaz vun der Nuklearenergie, notamment der héich effizienter Fusioun, als Energie vun der Zukunft?
- 4) Wéi beurteilt d'Regierung d'Perspektive vun der Weltraumökonomie fir dem oft diskutéierte Problem vun der Limitt vun de Ressourcen op der Äerd Rechnung ze droen? Op wéi eng Manéier gedenkt d'Regierung, déi vum fréiere Wirtschaftsminister Etienne Schneider lancéiert Initiativ vum Weltraum-"Biergbau" (Space mining) fort ze setzen, wuelwëssend, datt et sech hei no deene vun der Regierung selwer fixéierten Nohaltegkeetskrittären, em e ganz Zäregas intensive Secteur handelt? A wéi wäit iwwerschneid sech déi Initiativ "Space resources" nach mat där vum "Space mining"?

Mat déiwem Respekt,

Roy Reding  
Deputéierten

